



## SAILOR Nova akcija SIPA i Tužilaštva BiH ISKORISTILI POPLAVE I UTAJILI 1,5 MILIONA POREZA

**Uhapšeni su Dragan Talić, generalni direktor Sector Securitya, Ivan Petonjić, inspektor UIOBiH, te Miloš Milutinović, Željko Đekić, Domagoj Marić i B. M.**

Pripadnici Državne agencije za istrage i zaštitu (SIPA) preksinoć su od Tužilaštva BiH dobili nalog za hapšenje osumnjičenih za utaju milion i po maraka poreza. U akciji nazvanoj kodnim imenom Sailor, naoružani policajci sa fantomkama na glavama pretresli su šest lokacija na području Banje Luke i Mostara i uhapsili šest osoba. Kako nezvanično saznajemo, uhapšeni su Dragan Talić, generalni direktor Sector Securitya, Ivan Petonjić, inspektor Uprave za indirektno oporezivanje BiH, te Miloš Milutinović, Željko Đekić, Domagoj Marić i izvjesni B. M.

### Rigorožno kažnjavanje

Njima se, kako saznajemo, na teret stavlja da su počinili krivično djelo organizirani kriminal u vezi sa krivičnim djelima porezna utaja ili prevara, carinska prevara, protivzakonito posredovanje i zloupotreba položaja ili ovlaštenja. Neki od osumnjičenih, a kako se moglo vidjeti na snimci akcije hapšenja koju je napravila SIPA, uhapšeni su dok su gledali utakmicu osmine finala Svjetskog prvenstva u Brazilu između Holandije i Meksika. Kao pripadnici organizirane grupe osumnjičeni su da su, "iskoristivši stanje prirodne nesreće u BiH, vršili određene malverzacije prilikom sačinjavanja listi o oštećenju robe u pojedinim firmama, tako što su falsificirali i sačinjavali lažnu dokumentaciju kako bi prikazali veću štetu nego što jeste radi izbjegavanja plaćanja PDV obaveza, a sve s ciljem sticanja protivpravne imovinske koristi".

Istražitelji su tokom istrage došli do saznanja da su vlasnici firme BauWelt, u okviru koje posluju prodajni objekti OBI, izmjestili veliku količinu robe namijenjene prodaji, nakon čega su napravili lažnu do-

kumentaciju da je roba uništena u skladištima uslijed katastrofalnih poplava, koje su prije dva mjeseca zahvatile BiH, rečeno nam je u Tužilaštvu. Potom su robu vrijednu više od četiri miliona KM tajno izmjestili na druge lokacije kako bi se prodala i unovčila. Uz pomoć radnika Uprave za indirektno oporezivanje sačinili su dokumentaciju o tome da je roba oštećena i uništena u poplavama, a sve u cilju da izbjegnu plaćanje PDV-a i dažbina na navedenu robu od oko 1,5 miliona KM, za koje su oštećeni budžet i građani naše zemlje, kažu u SIPA. Kompanija OBI jučer je odmah oštro demantirala da ima veze sa ovim slučajem, ističući da je OBI Market u BiH franšizni centar koji radi isključivo na području Sarajeva, a da je BauWelt odvojeno pravno lice koje nema licencu OBI-ja.

Policija i Tužilaštvo su istragom utvrdili da su osumnjičeni imali namjeru da zatvore navedene poslovne objekte, te da su kao organizirana kriminalna skupina pokušali da iskoriste prirodne katastrofe radi počinjenja krivičnih djela. U Tužilaštvu ističu da će procesuirati sve osobe koje se pokušaju okoristiti situacijom nastalom usljed poplava. Svi uhapšeni će biti predati u



Saslušanje, pa odluka o pritvoru nadležnost Tužilaštva BiH, gdje će biti odlučeno o mjeri pritvora.

### Suspenzija?

Ratko Kovačević, portparol Uprave za indirektno oporezivanje BiH, jučer je kazao da Uprava aktivno učestvuje u akciji Sailor te da je izdala nalog za kontrolu poslovanja kompanije Ax-Tropic d.o.o. iz Banje Luke, a koja je generalni zastupnik BauWelta za BiH. Kovačević je pojasnio da je privedeni uposlenik UIOBiH na zahtjev kompanije Ax-Tropic izašao ispred Uprave na popis zaliha poreskog obveznika, te da će, ukoliko mu Sud odredi pritvor, biti suspendovan sa radnog mjesta.

**A. BRKIĆ ČEKIĆ**



Osumnjičeni uhapšeni dok su gledali utakmicu na TV-u